

Příčinam čekanja zadžěwać

Wěcywustojnje wo aktualnym problemje diskutowali

Biskopicy (JK/SN). Komuny a stat su w minjenych měsacach z přijimanjom, zeměstnjenjom a zastaranjom čekancow wulke wužadanje zmištrowali. Džakowano mjezynarodnym politiskim dojednanim je so ličba čekancow čujomnje znižila. To da wšitkim zamołwitym wodychnyć. Zwostanje pak dosć džěła a wužadanjow, potřebnym dale skutownje pomhać. Jedne z bytostnych prašenjow je, kak hodźeli so příčiny čekanja wobmjezować abo wotstronić.

Wo tym a wo dalších možnostach pomocy rěčeć bě zaměr diskusijnego popołdnja zawčerawšim w Biskopičanskej radnicy. Přeprošyla bě na nje zapóslanča CDU w zwjazkowym sejmje Marja Michałkowa. Jako fachowca měješe statneho sekretara w zwjazkowym minister-

stwje za zhromadne džěło a wuwíce Hans-Joachima Fuchтеля poboku. Tón zamó wěcywustojnje a na příklady so zložuju wo pomocnych napravach Němskeje w krajach Azije a Afriki rozprawjeć.

Na diskusijne popołdnjo běchu mjez druhim přichwatali komunalni politikarjo, zamołwići za prašenja čekancow kaž tež šulerjo Biskopičanskeho gymnazija.

W zawodnych słowach wobkrući Marja Michałkowa, zo je pomoc na městnje w tych krajach, z kotrychž čekancy přichadžeja, skutowniša hač zastaranje čekancow tu pola nas. To wobkrući Hans-Joachim Fuchtel ze wšelakimi napravami swojeho ministerstwa, kotrež zamóža skutownje pomhać, dotalne příčiny čekanja wotstronić. Pomoc jeho ministerstwa ma so zasadnje jenož njeknježer-

stwowym organizacijam posředkować. Runje te su kmáne skutownje pomhać.

W slědowacej diskusiji prašachu so mjez druhim gymnaziasća za tym, kak hodži so eksportowanje němских bróni z humanitarnej pomocu zjednočić. Komunalni politikarjo so skerje za konkretnymi možnostami podpěranja čekancow tu prašachu. Dale wulka čěža je po jich słowach, čekancam w dosahacej měrje zmóžnić, zo bychu němčinu nawuknyli.

Biskopičanski wyši měščanosta prof. Holm Große (njestronjan) zjima zarjadowanje z krótkimi, ale jadriwymi słowami: „Najskutowniša pomoc je ta, kotraž so hižo tu pola nas započina. Akceptanca a toleranca napřečo cuzym je zakład toho, zo so příčinam čekanja zadžěwa.“